



Landesverband Saar e.V.

Gerda's Gedichte - Ecke



Das Zelt

Diesjohr mechde mir mol richdich Urlaub mache,
unn weil uns oft's Kläängeld fehld bei soone Sache
sin mier am üwverlege hin und her
wie das am beschde anzustelle wär.
Denn koschde därf so was nedd viel,
sonschd sinn mier vorneweg schon gleich am Ziel.
Meins, hädd gäär, dass mier so dääde,
als hädde mir im Hinnergrund a e paar Monnede.
Ich grüble jedzd in meinem Sinn,
wie grien mier so ebbes nur hin.
Do saan ich hald mit schiefem Lache,
lassen de Babbe das nur mache.
Awwer, wie komme mier in die große Welt,
uff äämol wääs ich's : mit me Zelt.
Gleich lääs ich de Findling von vorne bis hinne,
um vielleicht e billisch Zelt zu finne.
Fachkenntnis hann ich jo kään debei
Awwer midd Glick, werdd uns schon zu helfe sei.
Spottbillig, mit viele Extras, stehd do drin,
das war so ganz no meinem Sinn.
Siebzig Mark soll es nur koschde,
die Stange missd mier halld entroschde.
Unn an de Näweseidde wär als mol e klän Löchelche drin,
awwer do käm de Rään, sowieso garnedd hin.
Do hann ich de Handel perfekt gemachd,
unn mei Liewwe stolz bedrachd.
Mudder, jetzt geht's uff große Rääs,
pack Sauerkraut, Kaffee, Speck unn Käs,
jetzt ischs ann uns mool zu bewaise,
dass ach Leidd, wie mier, kenne verreise.
Am Ankunftsart, Bruscd hochgeschwelld,
hann mir das Ding dann uffgestellt.
Nodem mir die Stange stunnelang verwechseld hann,
hadd das Zelt dann irgendwann gestann.
Mir misse wirklich was Besonneres an uns hann,
denn plötzlich hann all die Leidd um unser Zelt gestann.
Unn so freindlich gelachd hann se all no der Reih,
ich hann mich richdich geschmeicheld gefiehd dodebei.
Ääner hadd mich gefrood, ob mir Musiker wäre,
das hadd er mier awwer erscd misse erkläre.
Na, sagt er und zückd sei Kamera,
weil ihr Zelt aussieht, grad wie a Zieharmonika.
Mier hädde uns doch mol solle bemühe,

das ganze Gelump erschd richdich gladd zu ziehe.
Do hann ich gesaad, dass mir nedd kläänlich wäre,
der Rään würd das alles von selwer kläre.
Als sich dann die ledschde Neigierische verdrückt gehatt hann,
hadd plötzlich e Gewidder am Himmel gestann.
Wie midd Kүүwele hadd das plötzlich gegoss,
unn mier hann das im Zelt genoss.
Um unser Füss war plötzlich alles nass,
wo mier doch schloofe wollde, uff dem Gras.
Do kenne mier doch noher kään Woldeck druffleje,
was mier uns do bloß andun, midd dem bleede Råje.
Awwer an gudde Ideen fehlds mier eigentlich nie,
der Fahrplan stehd schon fesched, froo nedd wie.
Wie's nemme geräänd hadd, saan ich zu de Meine,
jedzd lege mier los, ach wenn die Sonn nedd dut scheine.
Jedzd redde mir, was noch iss zu redde,
unn baschdle uns, aus Holz die Bedde.
Im Wald hann mir dann Stämmcher geschlaa,
unn fleissisch zu unserem Zelt getraa.
Doch do brummds uff äämol in meim Schädel,
was mache mier ohne Werkzeich unn Näschel.
Meins saad, wo die Leidd hie so freindlich sinn ,
gehen mier äänfach bei die lehne dohin.
Unn mier hann wirklich alles gridd,
derweil uns der halwe Campingplatz voller Bewunnerung zusiehd.
Ääner hat gefrood, ob ich war Architekt,
bei der enorm Bauweise, die ich druff hädd.
Die ware uff uns dermaße erpicht,
nur hann se uff dem Platz, all so e komisch Grinse im Gesicht.
Die Leidd kenne jo nix defor, dass sie so e Macke hann,
s'isch halld nur traurig, wenn sie's merge irgendwann.
No mehrere Stunne war unser Werk dan gedaan,
unn beinah ändähdich gugg ich mier's aan.
Dodebei denk ich in meinem Sinn,
das bringe die annere hie all nedd so hin.
Dodeno hann mier all kräfdich Hunger gehadd,
mei Fraa saad, s'langd, mier werre all sadd.
Doch ans Gescherr gedengd hadd von uns kääner,
jedzd esse mier's Sauerkraut halld aus em Äämer.
Wie mier so richdich gesäddichd sinn,
leje mier uns dann uff das Geschdell dodehin.
Die ganze Nachd mään ich, ich würd Achderbahn fahre,
im Traum schreid mei Fraa, jedzd misse mier spare,
für was schrei ich, unn war ball am platze,
sie lallt bloß immer : Luftmatratze.

(© Gerda Wagner)